

# Heahtegásta

Juos ballojuvvo, ahte mánná jápmá iige báhppa leat dalán fidnemis doaimmahit gástta, galgá giinu girku lahttu gásttašit máná. Heahtegástta sáhtá doaimmahit maid eará kristtalaš. Gásttas galget leat duodašteaddjit, juos vejolaš. Heahtegásttas galgá ájahalakeahtá almmuhit áššái-gullelaš girkohearrádoaimmahahkii. Heahtegásta nannejuvvo girkogiehtagirjji mearrádusaid mielde. (GO 2: 14.) Seammá láhkai meannuduvvo, go heahtegásta addojuvvo gásttašmeahtun ollesolbmui.

Heahtegástta oktavuodas sáhtá lávlut sálmma (omd. 35–38, 434, 455, 456 dahje 459).

## 1. Gásta

---

Báhppa goive čázi golbmii máná oaivvi ala ja cealká:

*[NN (ovdanamat), ] mun gásttášan du Áhči ja Bártni ja  
Bassi Vuoiŋŋa nammii.*

## 2. Áhččámet

---

Herrá rohkos celkojuvvo ovttá jitnii.

**S** Áhččámet, don guhte leat almmis.

Basuhuvvos du namma.

Bohtos du riika.

Šaddos du dáhttu,

mo almmis nu maddái eatnama alde.

Atte midjiide odne min beaivválaš láibbi.

Ja atte midjiide min suddid ándagassii,

nugo miige ándagassii addit velggolaččaidasamet.

Alege doalvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Ámen.

### 3. Buressivdnáduš

---

Gásttašeaddji cealká:

Hearrá buressivdnidivččii din ja várjalivččii din.

Hearrá čuvgešii muođuidis didjiide

ja livččii didjiide árbmugas.

Hearrá jorgalivččii muođuidis din beallái

ja attášii didjiide ráfi.

Áhči ja + Bártni ja Bassi Vuoiŋŋa nammii.

**S** Ámen.